

U skladu sa članom 8 Zakona o Službenom glasniku Brčko distrikta BiH («Službeni glasnik Brčko distrikta BiH», brojevi: 1/00 i 17/04) i Odlukom o davanju ovlaštenja Zakonodavnoj komisiji Skupštine Brčko distrikta BiH broj: 01-02-218/17 od 13.09.2017. godine, Zakonodavna komisija Skupštine Brčko distrikta BiH na 42. sjednici održanoj 23.05.2018. godine utvrdila je prečišćeni tekst Zakona o javnim preduzećima u Brčko distriktu BiH („Službeni glasnik Brčko distrikta BiH“ broj 15/06) sa izmjenama i dopunama Zakona o javnim preduzećima u Brčko distriktu BiH („Službeni Brčko distrikta BiH“ brojevi: 5/07, 19/07, 1/08, 24/08, 17/16 i 7/18).

Broj: : 01.3.-05-566/18  
Brčko, 23.05.2018. godine

PREDSJEDAVAJUĆI  
ZAKONODAVNE KOMISIJE  
Ljubiša Lukić, s.r.

**ZAKON  
O JAVNIM PREDUZEĆIMA  
U BRČKO DISTRIKTU BOSNE I HERCEGOVINE  
(PREČIŠĆEN TEKST)**

**DIO PRVI**

**Član 1  
(Predmet zakona)**

Ovim zakonom se uređuju upravljanje i poslovanje javnog preduzeća u Brčko distriktu BiH, organi javnog preduzeća, prava, obaveze i odgovornosti osnivača i javnog preduzeća, izvori i način finansiranja, poslovni plan javnog preduzeća, prestanak javnog preduzeća i druga pitanja od značaja za rad javnog preduzeća.

**Član 2  
(Javno preduzeće)**

(1) Javno preduzeće, u smislu ovog zakona, je preduzeće koje obavlja djelatnosti od općeg interesa iz oblasti energetike, komunalnih djelatnosti i drugih djelatnosti, koje Skupština Brčko distrikta BiH odredi kao takve.

(2) Javno preduzeće može obavljati i druge djelatnosti na način i pod uslovima koji se primjenjuju na djelatnosti od općeg interesa.

(3) Javna preduzeća iz stava 1 ovog člana dužna su da informacije o svojoj finansijskoj i organizacionoj strukturi učine dostupnim javnosti, putem internet stranice.

**Član 2a  
(Principi na kojima se zasniva obavljanje djelatnosti preduzeća)**

(1) Obavljanje djelatnosti preduzeće iz člana 2 ovog zakona zasniva na sljedećim principima:

- a) jednakom tretmanu i slobodi osnivanja i pružanja usluga,
- b) transparentnosti,
- c) zabrani sporazuma javnih preduzeća koji imaju za posljedicu sprečavanje, ograničavanje ili narušavanje konkurencije na tržištu,

- d) zabrani zloupotrebe dominantnog položaja,
- e) nadziranju pomoći koju dodjeljuju davaoci državne pomoći davanjem povlastica određenim preduzećima ili proizvodnji određene robe, radi izbjegavanja narušavanja konkurencije,
- f) preventivnom nadziranju objedinjavanja preduzeća,
- g) liberalizaciji određenih djelatnosti od općeg interesa radi sprečavanja razvoja monopolističkih tendencija,
- h) osiguranju transparentnosti finansijskih odnosa između Brčko distrikta BiH i javnih preduzeća
- i) vođenju zasebnih računa, na način da se jasno razgraniče troškovi i prihodi povezani s različitim djelatnostima.

(2) Vlada Brčko distrikta BiH donosi pravilnik kojim detaljnije uređuje principe iz stava 1 ovog člana, u roku od 90 dana od dana stupanja na snagu ovog zakona.

### **Član 3 (Osnivač javnog preduzeća)**

- (1) Javno preduzeće osniva Brčko distrikt BiH.
- (2) Prava osnivača iz stava 1 ovog člana ostvaruje Skupština Brčko distrikta BiH.

### **Član 4 (Naziv javnog preduzeća)**

- (1) Naziv i skraćeni naziv javnog preduzeća mora da sadrži oznaku «JP» (javno preduzeće).
- (2) Odredbe Zakona o preduzećima Brčko distrikta Bosne i Hercegovine («Službeni glasnik Brčko distrikta BiH», brojevi: 11/01, 10/02, 14/02, 1/03, 8/03 i 4/04), koje se odnose na naziv preduzeća primjenjuju se i na javno preduzeće.

### **Član 5 (Oblik organizovanja)**

Javno preduzeće se organizuje u obliku društva s ograničenom odgovornošću.

### **Član 6 (Upis u sudski registar)**

Javno preduzeće se upisuje u registar kod nadležnog suda.

### **Član 7 (Osnivački akt)**

- (1) Akt o osnivanju javnog preduzeća sadrži:
  - a) naziv i sjedište osnivača,
  - b) naziv, sjedište i djelatnost javnog preduzeća,
  - c) prava, obaveze i odgovornosti osnivača,
  - d) prava, obaveze i odgovornosti javnog preduzeća,
  - e) odredbe o osnovnom kapitalu javnog preduzeća,
  - f) odredbe o izvorima i načinu finansiranja javnog preduzeća,
  - g) odredbe o načinu raspolaganja dobiti i pokrivanju gubitaka,
  - h) druge odredbe od značaja za rad javnog preduzeća i obavljanje djelatnosti od općeg interesa.

### **Član 8 (Odgovornost osnivača i javnog preduzeća)**

- (1) Javno preduzeće odgovara za svoje obaveze cjelokupnom svojom imovinom.
- (2) Osnivač ne odgovara za obaveze javnog preduzeća, izuzev do visine svog uloga.

**Član 9**  
**(Osnivanje drugih pravnih lica)**

Javno preduzeće može osnovati drugo pravno lice, uz saglasnost osnivača.

**DIO DRUGI**

**GLAVA I. ORGANI JAVNOG PREDUZEĆA**

**Odjeljak A. Upravni odbor**

**Član 10**  
**(Organ upravljanja)**

- (1) Upravni odbor je organ upravljanja u javnom preduzeću.
- (2) Upravni odbor svoj rad reguliše poslovníkom o radu.

**Član 11**  
**(Sastav, uslovi za članstvo i naknada za rad u upravnom odboru)**

- (1) Upravni odbor sastoji se od pet članova.
- (2) Uslovi za članstvo u upravnom odboru utvrđuju se aktom o osnivanju javnog preduzeća.
- (3) U upravni odbor mogu biti imenovana najviše tri člana iz reda državnih i javnih službenika zaposlenih u organima javne uprave i institucijama Brčko distrikta BiH.
- (4) Mjesečna naknada za rad člana upravnog odbora utvrđuje se u najvišem iznosu do 70% od iznosa jedne prosječne neto plate zaposlenih u tom javnom preduzeću.
- (5) Predsjedniku upravnog odbora naknada iz stava 4 ovog člana uvećava se za 20%.

**Član 11a**  
**(Postupak izbora i imenovanja članova upravnog odbora)**

- (1) Gradonačelnik imenuje komisiju iz reda zaposlenih u organima javne uprave Brčko distrikta Bosne i Hercegovine, za izbor kandidata za članove upravnog odbora javnog preduzeća (u daljnjem tekstu: komisija) koja se sastoji od pet članova.
- (2) Komisija raspisuje konkurs za izbor i imenovanje članova upravnog odbora koji se objavljuje u tri dnevna lista dostupna na cijeloj teritoriji Bosne i Hercegovine.
- (3) Članovi upravnog odbora biraju se na osnovu profesionalnih sposobnosti i odražavaju sastav stanovništva Brčko distrikta BiH.
- (4) Komisija utvrđuje da li svi kandidati ispunjavaju uslove konkursa, intervjuiše i ocjenjuje kandidate te utvrđuje rang-listu kandidata koju dostavlja gradonačelniku.
- (5) Gradonačelnik imenuje upravni odbor s rang-liste kandidata koju utvrdi komisija, u roku od 30 dana od dana dostavljanja.
- (6) Odluka o imenovanju članova upravnog odbora javnog preduzeća je konačna i protiv nje se može pokrenuti upravni spor.

(7) Odluka o imenovanju članova upravnog odbora objavljuje se u Službenom glasniku Brčko distrikta Bosne i Hercegovine.

(8) Postupak izbora članova upravnog odbora mora biti okončan prije isteka mandata dotadašnjim članovima upravnog odbora.

(9) Komisija iz stava 1 ovog člana donosi poslovnik o svom radu.

### **Član 12 (Uslovi za članove upravnog odbora)**

(1) Članovi upravnog odbora ne mogu biti:

- a) direktori javnih preduzeća,
- b) lica koja su u upravnim odborima drugih javnih preduzeća,
- c) direktor drugog preduzeća koje je osnovano ili je u vlasništvu javnog preduzeća,
- d) lica koja su pravosnažnom sudskom presudom osuđivana za vršenje krivičnih djela i lica protiv kojih se vodi krivični postupak, osim krivičnih djela iz oblasti saobraćaja.

### **Član 13 (Mandat upravnog odbora)**

Upravni odbor se imenuje na period od četiri godine, uz mogućnost ponovnog imenovanja, s tim da isti članovi ne mogu biti imenovani više od dva puta uzastopno.

2) Članovima upravnog odbora mandat prestaje po sili zakona nakon isteka perioda na koji su imenovani.

### **Član 14**

(1) Pored nadležnosti koje proizilaze iz ostalih odredbi ovog zakona, upravni odbor javnog preduzeća:

- a) usvaja statut javnog preduzeća uz saglasnost osnivača;
- b) usvaja godišnji poslovni plan javnog preduzeća uz saglasnost osnivača ;
- c) usvaja dugoročni plan razvoja javnog preduzeća uz saglasnost osnivača;
- d) odlučuje o statusnim promjenama javnog preduzeća (podjela, spajanje i pripajanje), uz saglasnost osnivača;
- e) odlučuje o povećanju i smanjenju kapitala javnog preduzeća, uz saglasnost osnivača;
- f) odlučuje o unutrašnjoj organizaciji javnog preduzeća uz saglasnost osnivača ;
- g) vrši izbor i odobrava ugovor zaključen sa eksternim revizorom;
- h) usvaja završni račun koji priprema direktor i dostavlja Skupštini Distrikta na odobrenje.

(2) Upravni odbor javnog preduzeća odlučuje i o drugim pitanjima iz svoje nadležnosti u skladu sa Zakonom, aktom o osnivanju i Statutom javnog preduzeća, te drugim važećim propisima.

### **Član 15 (Kvorum na sjednicama upravnog odbora)**

Odluke upravnog odbora su punovažne ako su donesene u prisustvu više od polovine ukupnog broja članova upravnog odbora.

**Član 16**  
**(Donošenje odluka upravnog odbora)**

Upravni odbor donosi odluke većinom glasova ukupnog broja članova upravnog odbora.

**Član 17**  
**(Razrješenje upravnog odbora)**

(1) Osnivač može razriješiti članove upravnog odbora prije isteka perioda na koji su imenovani i to:

- a) na zahtjev člana,
- b) ukoliko član više ne ispunjava uslove za članstvo,
- c) ukoliko član ne izvršava svoje obaveze i dužnosti u skladu sa zakonom, aktom o osnivanju i statutom javnog preduzeća, te drugim važećim propisima.

**Član 18**  
**(Odgovornosti upravnog odbora)**

Upravni odbor odgovara za svoj rad osnivaču javnog preduzeća.

(2) Članovi upravnog odbora javnog preduzeća iz reda službenika zaposlenih u organima javne uprave i institucijama Brčko distrikta BiH dužni su podnositi kvartalne izvještaje o radu Vladi Brčko distrikta BiH i osnivaču.

**Odjeljak B. Direktor**

**Član 19**  
**(Poslovodni organ)**

(1) Direktor je organ koji organizuje rad i vodi poslovanje javnog preduzeća.

(2) (2) Direktor ima dva zamjenika direktora.

**Član 20**  
**(Imenovanje direktorai zamjenika direktora)**

Direktora i zamjenike direktora imenuje upravni odbor, putem javnog konkursa, u skladu sa uslovima propisanim Statutom Brčko distrikta BiH, zakonom, aktom o osnivanju i statutom javnog preduzeća, te drugim aktima javnog preduzeća.

(2) Prilikom sprovođenja postupka za imenovanje direktora i zamjenika direktora upravni odbor:

(a) raspisuje i objavljuje javni konkurs za upražnjenu poziciju direktora i zamjenika direktora;

(b) vrši odabir kandidata

(c) zakazuje usmeni intervju, odnosno pismeno testiranje.

(d) ocjenjuje profesionalne sposobnosti odabranih kandidata kroz:

(1) usmeni intervju;

(2) pismeno testiranje ili zadavanje praktičnog rada prije samog intervjua, kada ocijeni da je neophodno demonstriranje znanja i vještina odabranih kandidata;

(e) sačinjava rang-listu intervjuisanih kandidata.

(3) Upravni odbor donosi odluku o izboru i imenovanju najuspješnijeg kandidata za direktora i zamjenika direktora.

(4) Postupak izbora direktora i zamjenika direktora mora biti okončan prije isteka mandata dotadašnjeg direktora i zamjenika direktora.

(5) U slučaju da je prije okončanja procedure imenovanja direktora i zamjenika direktora istekao mandat članovima upravnog odbora preduzeća, Skupština imenuje vršioca dužnosti direktora i zamjenika direktora preduzeća.

(6) Vršilac dužnosti direktora i zamjenika direktora preduzeća se imenuje na period do okončanja postupka imenovanja direktora i zamjenika direktora, a najduže šest mjeseci.

### **Član 21 (Uslovi za direktora i zamjenika direktora)**

(1) Za direktora i zamjenika direktora može biti imenovano lice koje ima:

- a) državljanstvo Bosne i Hercegovine,
- b) najmanje visoku stručnu spremu,
- c) najmanje pet godina radnog iskustva.

(2) Za direktora i zamjenika direktora ne može biti imenovano lice koje je pravosnažnom sudskom presudom osuđivano za vršenje krivičnih djela i lica protiv kojeg se vodi krivični postupak, osim krivičnih djela iz oblasti saobraćaja.

### **Član 22 (Mandat direktora i zamjenika direktora)**

Direktora i zamjenika direktora imenuje upravni odbor na period od četiri godine, uz mogućnost ponovnog imenovanja, s tim što isto lice ne može biti imenovano više od dva puta uzastopno.

### **Član 23 (Nadležnosti i ovlašćenja direktora)**

(1) Direktor predstavlja i zastupa javno preduzeće.

(2) Direktor, u odnosu na upravni odbor, priprema akte iz nadležnosti upravnog odbora, sprovodi odluke upravnog odbora i odlučuje o pitanjima iz svoje nadležnosti u skladu sa zakonom, aktom o osnivanju i statutom javnog preduzeća, te drugim važećim propisima.

### **Član 23a (Nadležnost i ovlaštenja zamjenika direktora)**

(1) Zamjenici direktora pomažu direktoru u vršenju njegovih dužnosti i zamjenjuju ga u slučajevima odsutnosti ili spriječenosti.

(2) U slučaju odsutnosti ili spriječenosti direktora mijenja ga zamjenik kojeg direktor odredi.

(3) Zamjenici direktora imaju sva prava, obaveze i odgovornosti direktora kada ga mijenjaju.

### **Član 24 (Razrješenje direktora)**

(1) Upravni odbor može razriješiti direktora s dužnosti prije isteka perioda na koji je imenovan i to:

- a) na zahtjev direktora,
- b) ukoliko direktor više ne ispunjava uslove za imenovanje,

- c) ukoliko su ispunjeni drugi uslovi propisani zakonom, aktom o osnivanju, statutom
- d) i drugim važećim aktima javnog preduzeća,
- e) ukoliko direktor ne izvršava obaveze i dužnosti koje su propisane zakonom,
- f) aktom o osnivanju ili drugim aktima javnog preduzeća.

(2) Odredbe iz stava 1 ovog člana primjenjuju se i za razrješenje zamjenika direktora.

### **Član 25 (Odgovornosti direktora i zamjenika direktora)**

(1) Direktor odgovara upravnom odboru za rezultate poslovanja i zakonitost rada javnog preduzeća.

(2) Zamjenici direktora za svoj rad odgovaraju direktoru i upravnom odboru.

### **Član 25a (Plata direktora)**

Plata direktora javnog preduzeća ne može se utvrditi u iznosu većem od plate šefa odjeljenja Vlade Brčko distrikta BiH.

### **Član 26 (Vršilac dužnosti direktora)**

- 1) Osnivač imenuje vršioca dužnosti direktora, koji će zastupati javno preduzeće u postupku upisa javnog preduzeća u registar kod nadležnog suda, te obavljati druge poslove i dužnosti direktora u skladu sa aktom o imenovanju vršioca dužnosti direktora javnog preduzeća.
- 2) Upravni odbor može imenovati vršioca dužnosti direktora do imenovanja novog direktora, a najduže na period do šest mjeseci, u slučaju ostavke, smrti ili razrješenja direktora s dužnosti prije isteka perioda na koji je direktor imenovan.
- 3) Direktor zastupa javno preduzeće u postupku registracije javnog preduzeća kod nadležnog suda ukoliko je ta osoba već imenovana ili od momenta imenovanja te osobe.
- 4) Vršilac dužnosti direktora iz stava 2 ovog člana mora ispunjavati uslove propisane za direktora javnog preduzeća

### **Član 27 (Sukob interesa)**

(1) Direktor, zamjenici direktora i članovi upravnog odbora ne mogu biti vlasnici, zakonski zastupnici ili zaposleni u bilo kom drugom preduzeću iste ili srodne djelatnosti koje bi moglo biti konkurentno s javnim preduzećem.

(2) Direktor, zamjenici direktora i članovi upravnog odbora su dužni dati izjavu o svom materijalnom stanju u skladu s članom 21 Statuta Brčko distrikta Bosne i Hercegovine.

### **Član 27a (Zapošljavanje u javnom preduzeću)**

(1) Direktor vrši zapošljavanje u javnom preduzeću na osnovu obavezujuće odluke komisije koju imenuje direktor.

(2) Zaposleni se biraju javnim konkursom.

- (3) Komisiju iz člana 1 ovog stava čine
- a) predsjednik upravnog odbora
  - b) direktor
  - c) zaposlenik javnog preduzeća odgovoran za kadrovske poslove

(4) komisija iz stava 1 ovog člana izabere najuspješnijeg kandidata na način propisan u članu 20 stavu 2 ovog zakona.

(5) komisija donosi odluku o izboru najuspješnijeg kandidata.

(6) Zaposlenici koji su u organima javne uprave obavljali poslove koji su preneseni u nadležnost javnogpreduzeća mogu biti preuzeti kao zaposlenici javnog preduzeća, što se reguliše aktom o osnivanju.

## **GLAVA II. IMOVINA I POSLOVNE AKTIVNOSTI JAVNOG PREDUZEĆA**

### **Član 28 (Statut i drugi opći pravni akti)**

- 1) Statut javnog preduzeća donosi upravni odbor uz saglasnost osnivača u roku od 90 dana od dana upisa javnog preduzeća u registar kod nadležnog suda.
- 2) Statut javnog preduzeća stupa na snagu danom davanja saglasnosti osnivača na statut.
- 3) Izmjene i dopune statuta javnog preduzeća vrše se na način propisan za njegovo donošenje.
- 4) Javno preduzeće donosi i druge opće pravne akte u skladu sa zakonom, aktom o osnivanju i statutom javnog preduzeća, te drugim važećim propisima.
- 5) Svi opći pravni akti javnog preduzeća objavljuju se u Službenom glasniku Brčko distrikta Bosne i Hercegovine.

### **Član 29 (Godišnji plan poslovanja)**

(1) Za svaku kalendarsku godinu javno preduzeće donosi plan poslovanja koji predstavlja osnov svih poslovnih aktivnosti javnog preduzeća u periodu za koji se plan donosi.

(2) Poslovni plan, naročito, sadrži planirane iznose prihoda i rashoda javnog preduzeća po namjeni, broj zaposlenih i iznos novčanih sredstava za plaće zaposlenih, iznos sredstava za potrebe javnog preduzeća, kapitalne izdatke i izvore finansiranja, podatke o planiranim zajmovima i kreditima, davanju garancija, u periodu koji plan poslovanja obuhvata.

(3) Do usvajanja plana poslovanja osnivač može da odredi uslove i način obračuna sredstava za plaće zaposlenih u javnom preduzeću.

(4) Nakon usvajanja plana poslovanja javnog preduzeća on se dostavlja organu nadležnom za budžet i finansije Vlade Brčko distrikta BiH.

### **Član 30 (Kapital javnog preduzeća)**



- (1) Osnovni kapital javnog preduzeća se može sastojati od uloženih novčanih sredstava i uloga u pravima i stvarima.
- (2) Osnovni kapital javnog preduzeća se utvrđuje aktom o osnivanju javnog preduzeća.
- (3) Na osnovu uloga koji je osnivač uložio u javno preduzeće, osnivač stiče pravo vlasništva nad 100% udjela u kapitalu javnog preduzeća.

### **Član 31 (Izvori finansiranja)**

- (1) Javno preduzeće se finansira iz sljedećih izvora:
  - a) prihoda od obavljanja djelatnosti javnog preduzeća,
  - b) budžeta Brčko distrikta BiH i
  - c) drugih izvora.

(2) Sredstva iz budžeta Brčko distrikta BiH se obezbjeđuju u skladu sa usvojenim planom poslovanja javnog preduzeća.

### **Član 32 (Cjenovnik roba i usluga)**

- (1) Cjenovnik roba i usluga javnog preduzeća određuje upravni odbor javnog preduzeća.
- (2) Cijenu isporučene električne energije, isporučene vode i izvršenih usluga odvoza smeća određuje upravni odbor preduzeća uz saglasnost osnivača.

### **Član 33 (Infrastruktura od općeg interesa)**

(1) Imovina koja je aktom o osnivanju javnog preduzeća definisana kao infrastruktura od općeg interesa može postati vlasništvo javnog preduzeća, ukoliko je finansirana iz prihoda obavljanja djelatnosti javnog preduzeća.

(2) Prava i obaveze između osnivača i javnog preduzeća u vezi s upravljanjem i korištenjem infrastrukture od općeg interesa uređuju se aktom o osnivanju javnog preduzeća.

(3) Imovina iz stava 1 ovog člana može se opteretiti i otuđiti samo uz prethodnu saglasnost osnivača, a u skladu sa zakonom i drugim važećim propisima.

### **Član 34 (Raspologanje pokretnostima i nepokretnostima)**

- (1) Javno preduzeće može da raspolaze pokretnim stvarima u vlasništvu javnog preduzeća.
- (2) Javno preduzeće može opteretiti, otuđiti, ili na drugi način raspolagati nekretninama u vlasništvu javnog preduzeća, samo uz saglasnost osnivača, a u skladu sa zakonom i drugim važećim propisima.

### **Član 35 (Nedopuštene poslovne aktivnosti)**

- (1) Javno preduzeće ne smije preduzimati sljedeće poslovne aktivnosti:
  - a) pozajmljivanje ili davanje kredita zaposlenim u javnom preduzeću ili drugim licima ili pružanje garancija za kredit,

- b) isplate plaća protivno propisima o radu ili trošenje kreditnih sredstava za namirenje plaća zaposlenim u javnom preduzeću.

### **Član 36 (Poremećaj u poslovanju)**

(1) U slučaju poremećaja u poslovanju javnog preduzeća (nesolventnost, ugrožavanje života i zdravlja ljudi ili imovine) osnivač može preduzeti mjere kojima će obezbijediti nesmetano funkcionisanja i obavljanje djelatnosti javnog preduzeća, a naročito:

- a) razriješiti dužnosti članove upravnog odbora,
- b) promijeniti unutrašnju organizaciju javnog preduzeća.

### **Član 37 (Razlozi za prestanak)**

Javno preduzeće prestaje:

- a) odlukom osnivača,
- b) ako su ispunjeni drugi razlozi za prestanak u skladu sa Zakonom o preduzećima Brčko distrikta Bosne i Hercegovine.

### **Član 38 (Izveštaj o radu)**

Javno preduzeće podnosi Skupštini Brčko distrikta BiH i gradonačelniku Brčko distrikta BiH izvještaj o radu javnog preduzeća najmanje jednom godišnje.

### **Član 39 (Javna nabavka)**

Javno preduzeće sprovodi postupak nabavke roba, usluga i izvođenja radova u skladu sa zakonom koji reguliše tu oblast.

### **Član 40 (Interna kontrola)**

Interna kontrola transakcija prihoda i rashoda javnog preduzeća vrši se u skladu s važećim propisima.

### **Član 41 (Revizija finansijskog poslovanja)**

Revizija finansijskog poslovanja javnog preduzeća vrši se na način i u roku propisanom važećim propisima.

## **DIO TREĆI**

### **Član 42 (Primjena propisa)**

Za sva pitanja koja nisu regulisana ovim zakonom primjenjuju se odredbe Zakona o preduzećima Brčko distrikta Bosne i Hercegovine («Službeni glasnik Brčko distrikta BiH», brojevi: 11/01, 10/02, 14/02, 1/03, 8/03 i 4/04).

**Član 43**  
**(Stupanje na snagu)**

Zakon o javnim preduzećima u Brčko distriktu BiH stupio je na snagu 27. maja 2006. godine, a njegove izmjene i dopune 17. jula 2007. godine, 20. novembar 2007. godine, 21. juna 2008. godine, 9. juna 2016. godine i 15. marta 2018. godine.